

# In Memoriam

## Prof. dr. Fikret Hadžić (1960–2018)

Prof. dr. Fikret Hadžić rođen je 1960. godine u Foči. Nakon završenog Ekonomskog fakulteta u Sarajevu (EFSA), svoju profesionalnu karijeru započeo je u preduzeću Unioninvest Sarajevo radeći na različitim ekonomskim poslovima. Na EFSA je i magistrirao 1989. godine. Od 1985. do početka 1992. godine radio je u današnjoj UniCredit banci d. d. Mostar (bivša HVB-Central Profit Banka) na poslovima višeg stručnog saradnika u kreditnom sektoru, a kasnije i pomoćnika direktora direkcije. U toku Agresije na BiH, živio je u Sarajevu gdje je radio na različitim poslovima i humanitarnim projektima pomoći građanima BiH. Nakon agresije, kratko radi u Vladinoj Agenciji za međunarodnu saradnju u obnovi i razvoju BiH, te u Banci za obnovu i razvoj BiH kao pomoćnik, odnosno zamjenik direktora.

Od 1996. godine zasniva radni odnos na EFSA u zvanju višeg asistenta, te do svoje smrti 2018. godine ostaje da radi u ovoj instituciji i napreduje u akademskim zvanjima od višeg asistenta do redovnog profesora 2015. godine. Jula 2003. godine odbranio je doktorsku disertaciju na EFSA na temu: “Bankarstvo islamskih zemalja u funkciji finansiranja privrednog razvoja”, a oktobra iste godine izabran je u zvanje docent.

Na EFSA dodiplomskom, postdiplomskom i doktorskom studiju predavao je više nastavnih predmeta iz oblasti bankarstva, islamskog bankarstva i finansija i analize investicija. Od njihovog osnivanja 2013. godine, bio je rukovodilac Centra za islamsku ekonomiju, bankarstvo i finansije na EFSA, te Predsjednik Upravnog odbora European Association for Islamic Economics, Banking and Finance, te je bio akademski koordinator i profesor na zajedničkom međunarodnom Islamic Banking master studiju EFSA i University of Bolton.

Autor je tri knjige iz oblasti islamske ekonomije i finansija: "Islamsko bankarstvo u teoriji i praksi" (objavljena 2014. godine); "Islamsko finansijsko tržište" (objavljena 2014. godine); "Osnovi islamske ekonomije i finansije", (objavljena 2007. godine), te monografije: "Islamsko bankarstvo i ekonomski razvoj", (objavljena 2005. god.). Također, prof. dr. Fikret Hadžić je koeditor i koautor knjige "Critical Issues and Challenges in Islamic Economics and Finance Development" u izdanju Palgrave McMillan. Autor je ili koautor više stručnih i naučnih radova objavljenih u domaćim i međunarodnim časopisima prezentiranim na stručnim i naučnim konferencijama i simpozijima u zemlji i inostranstvu.

Prof. dr. Fikret Hadžić uspješno se bavio i konsultantskim radom iz oblasti finansija, bankarstva i investiranja. Poseban doprinos u BiH je dao u radu sa komercijalnim, razvojnim i islamskim bankama. Također je radio za inostrane investitore kao konsultant u procesu osnivanja banaka u BiH, privatizacije, direktnih stranih investicija i kreiranja poslovnog nastupa na tržištu BiH.

Bio je član Nadzornog odbora Razvojne banke FBiH, te Nadzornog odbora SERDA-Sarajevske ekonomske razvojne agencije, član odbora za reviziju osiguravajuće kompanije VGT Osiguranja iz Visokog, te Asfaltgradnje Visoko. Bio je predsjednik Nadzornog odbora Investicijske banke Federacije BiH, član Upravnog odbora Agencije za privatizaciju Kantona Sarajevo, te predsjednik Udruženja poslovnih savjetnika u BiH-LESPnet, te član Upravnog odbora Fondacije za unapređenje obrazovanja i kulture "Izvor nade".

Kao konsultant radio je na više od tri stotine investicionih, privatizacionih i konsultantskih projekata za domaće i inostrane subjekte. Samostalno je realizovao desetine seminara za mikro, mala i srednja preduzeća iz oblasti pokretanja, upravljanja i finansiranja vlastitog biznisa, razvoja poslovnih / industrijskih zona, kao i izrade poslovnih planova. Bio je i predavač na Bankarskoj akademiji Poslovne akademije Ekonomskog fakulteta Sarajevo, školama za samostalne računovođe, interne kontrolore i revizore, te stečajne upravitelje.

Bio je i član organizacionog odbora nekoliko međunarodnih konferencija: Sarajevo Islamic Finance and Economics Conference (SIFEC 2014 i SIFEC 2018), te 7th International Conference of the School of Economics and Business (ICIBF 2016).

Bio je mentor kod izrade i odbrane nekoliko doktorskih radova, te velikog broja magistarskih i završnih radova II ciklusa studija. Recenzent

je dvije knjige iz oblasti islamskih finansija, te više stručnih i naučnih radova. Do svoje smrti, prof. dr. Fikret Hadžić bio je član redakcije časopisa “Znakovi vremena”, Naučnoistraživačkog instituta “Ibn Sina“ u Sarajevu.

---

Velid Efendić